R E P U B L I K A E S H Q I P Ë R I S Ë

KOMISIONERI PËR TË DREJTËN E INFORMIMIT DHE MBROJTJEN E TË DHËNAVE PERSONALE

DREJTORIA E PËRGJITHSHME PËR MBROJTJEN E TË DHËNAVE PERSONALE
DREJTORIA E HETIMIT SEKTORIAL DHE SIGURISË SË TË DHËNAVE

Nr. 1636/6 prot. Tiranë, më 14.07.2026

REKOMANDIM

Nr. 41, datë 14.07.2026

PËR KONTROLLUESIN, SHOQËRIA "NOSHI" SHPK

Në mbështetje të neneve 81, 82, 83 dhe 84 të ligjit nr. 124/2024 "Për mbrojtjen e të dhënave personale" (në vijim "Ligji"), neneve 77-112 të Ligjit nr. 44/2015 "Kodi i Procedurave Administrative i Republikës së Shqipërisë" (në vijim "Kodi i Procedurave Administrative"), si dhe provave të administruara në ngarkim të Kontrolluesit "NOSHI" sh.p.k. (në vijim "Kontrolluesi"),

KONSTATOHET SE:

Në zbatim të Urdhrit nr. 134, datë 12.06.2026, të Komisionerit për të Drejtën e Informimit dhe Mbrojtjen e të Dhënave Personale (në vijim "Komisioneri"), u krye hetimi administrativ pranë Kontrolluesit, me objekt:

- *Zbatimi i ligjit nr. 124/2024 "Për mbrojtjen e të dhënave personale" dhe akteve të miratuara nga Komisioneri, në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit nga Kontrolluesi në kuadër të zbatimit të detyrimeve ligjore në fushën e mbrojtjes së të dhënave personale.*

Komisioneri, pasi shqyrtoi relacionin e grupit të hetimit, procesverbalin e hetimit administrativ dhe provat e administruara gjatë ushtrimit të hetimit pranë Kontrolluesit, vëren se:

1. Kontrolluesi është i regjistruar në Qendrën Kombëtare të Biznesit me NUIS J91524007E, me objekt aktiviteti "Import-eksport, tregtim me shumicë dhe pakicë i makinave dhe pjesëve të këmbimit të tyre. Dhënie dhe përdorim makina me qira etj."

"NOSHI" sh.p.k. është një shoqëri tregtare e specializuar në fushën e tregtimit të automjeteve, e cila ofron shërbime të shitjes së automjeteve dhe shërbime të lidhura me to. Në kuadër të veprimtarisë që ushtron, Kontrolluesi mbledh dhe përpunon të dhëna personale për kategorinë e të dhënave "punonjës", "klientë", "vizitorë" etj. Përpunimi i të dhënave personale kryhet në mënyrë manuale dhe elektronike.

2. Kontrolluesi ka të instaluar sistemin e video-survejimit (CCTV), përmes të cilit kryen mbikëqyrjen e ambienteve të brendshme dhe të jashtme ku ushtron veprimtarinë e tij.

   Nga analizimi i planvendosjes së kamerave konstatohet se disa prej tyre janë të instaluara dhe orientuara në mënyrë të tillë që monitorojnë ambientet e jashtme të ndërtesës, duke përfshirë edhe ambiente të tjera, që nuk janë pjesë e ambienteve të ushtrimit të veprimtarisë së Kontrolluesit, në kundërshtim nenet6 dhe 7 të Ligjit dhe Udhëzimin nr. 03, datë 30.04.2025 "Për përpunimin e të dhënave personale nga sistemet e video-survejimit" (në vijim "Udhëzimi nr. 3").

   Zyra e Komisionerit vlerëson se një nga mjetet e rëndësishme të përpunimit të të dhënave personale është edhe sistemi i video-survejimit CCTV. Të dhënat e ruajtura në këto sisteme, si "imazhe" e "video", janë të dhëna personale dhe përpunimi i tyre duhet të jetë në përputhje me parimet e përpunimit të parashikuara në nenin 6 të Ligjit, si ligjshmëria, drejtësia dhe transparenca, kufizimi i qëllimit, minimizimi i të dhënave, saktësia, kufizimi i afatit të ruajtjes, integriteti dhe konfidencialiteti i të dhënave, si dhe aktet e miratuara nga Komisioneri në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit nga Kontrolluesi.

   Në rastin konkret, vendosja e kamerave me orientim në hapësira të jashtme të palëve të treta sjell përpunim të paligjshëm, pasi Kontrolluesi nuk ka arritur të provojë se mbështetet në një kriter të qartë ligjor, sipas parashikimeve të nenit 7 të Ligjit.

3. Nga verifikimi në faqen zyrtare https://www.opel-noshi.al, rezulton se Kontrolluesi ka hartuar dhe publikuar rubrikën "Politikat e Privatësisë". Nga shqyrtimi i përmbajtjes së saj, konstatohet se mungojnë elemente thelbësore të transparencës dhe, konkretisht, nuk identifikohet qartë kontrolluesi dhe personi i kontaktit, nuk shpjegohen në mënyrë të plotë bazat ligjore për secilin përpunim dhe mekanizmat e pëlqimit për *cookies* dhe marketing, nuk përcaktohen të drejtat e subjektit të të dhënave sipas legjislacionit shqiptar për mbrojtjen e të dhënave personale, si dhe nuk evidentohet informacioni për ankesën pranë autoritetit mbikëqyrës.

   Gjithashtu, në përmbajtje të Politikave të Privatësisë nuk pasqyrohen masat teknike dhe organizative që Kontrolluesi zbaton për mbrojtjen e të dhënave personale, si dhe çdo referencë ndaj masave të sigurisë të enkriptimit, pseudonimizimit, kontrollit të aksesit, garantimit të konfidencialitetit etj., në kundërshtim me parashikimet e nenit 13 të Ligjit.

   Zyra e Komisionerit vlerëson se faqja zyrtare e internetit përbën zakonisht pikën e parë të kontaktit ndërmjet Kontrolluesit dhe subjektit të të dhënave, ndaj mungesa e

një politike ose publikimi i saj në mënyrë jo të plotë i kufizon informacionin e nevojshëm të subjekteve mbi qëllimin dhe mënyrën e përpunimit të të dhënave personale.

Gjithashtu, publikimi i rubrikës "Politikat e Privatësisë" është thelbësor për ushtrimin efektiv të të drejtave të subjekteve të të dhënave. Vetëm përmes informimit të plotë sipas parashikimeve të nenit 13 të Ligjit, subjektet e të dhënave mund të njihen me të drejtat e tyre dhe me mënyrën për t'i ushtruar ato, duke shmangur situatat ku këto të drejta mbeten formale dhe të pazbatueshme në praktikë. Njëkohësisht, ato shërbejnë si mjet parandalues ndaj praktikave joligjore ose të njëanshme të Kontrolluesit gjatë përpunimit të të dhënave personale.

4. Nga shqyrtimi i dokumentacionit të administruar, konstatohet se Kontrolluesi ka nënshkruar një kontratë shërbimi me subjektin tregtar "Evolve Web Studio" sh.p.k., sipas së cilës shërbimi do të konsistojë në realizimin e aktiviteteve dhe shërbimeve që mundësojnë përgatitje dhe mirëmbajtje të faqeve të internetit, ofrim *domain*-esh, shërbime *web hosting*, shërbime të telekomunikacionit, përgatitje dhe mirëmbajtje e rrjeteve sociale në internet, marketing *online* etj.

   Megjithatë, Kontrolluesi nuk ka lidhur një marrëveshje në të cilën të specifikohen masat konkrete tekniko-organizative të detyrueshme për t'u zbatuar nga ana e subjektit tregtar/përpunuesit, me qëllim garantimin e sigurisë dhe përpunimit të ligjshëm të të dhënave personale, sipas parashikimeve të nenit 26 të Ligjit dhe Udhëzimit nr. 19, datë 03.08.2012, të Komisionerit "Mbi rregullimin e marrëdhënieve mes kontrolluesit dhe përpunuesit në rastet e delegimit të përpunimit të të dhënave dhe përdorimin e një kontrate tip në rastet e këtij delegimi", i ndryshuar (në vijim "Udhëzimi nr. 19").

   Zyra e Komisionerit vlerëson se çdo delegim i përpunimit të të dhënave personale duhet të realizohet përmes një kontrate/marrëveshjeje të shkruar dhe të detajuar, e cila përcakton qëllimin e përpunimit, kategoritë e të dhënave, masat e sigurisë që do të zbatojë përpunuesi, përgjegjësitë ligjore dhe procedurat për kontrollin dhe raportimin. Kjo siguron që delegimi të jetë në përputhje me legjislacionin në fuqi, në mënyrë që të sigurohet që përpunuesi të garantojë përpunim të ligjshëm dhe të sigurt të të dhënave, sipas parashikimeve të nenit 26 të Ligjit.

5. Nga shqyrtimi i dokumentacionit të vendosur në dispozicion nga Kontrolluesi, pjesë e dokumentacionit në funksion të përputhshmërisë me legjislacionin për mbrojtjen e të dhënave personale, rezulton se Kontrolluesi disponon rregulloren "Për mbrojtjen e të dhënave personale" dhe rregulloren "Për administrimin, sigurinë dhe mbrojtjen e të dhënave personale".

   Megjithatë, nga shqyrtimi i përmbajtjes së këtyre akteve, rezulton se në to nuk janë të parashikuara rregulla specifike mbi mënyrën e përpunimit të të dhënave personale, si mënyra e mbledhjes dhe regjistrimit, si dhe masat konkrete tekniko-organizative që aplikohen nga Kontrolluesi në funksion të ruajtjes dhe konfidencialitetit të të dhënave,

sipas parashikimeve të neneve 27 dhe 28 të Ligjit, me qëllim garantimin e përpunimit të ligjshëm dhe sigurisë së të dhënave, në përputhje me proceset përpunuese që kryen.

Zyra e Komisionerit vlerëson se përshtatja dhe plotësimi i rregullores "Për mbrojtjen e të dhënave personale" dhe rregullore "Për administrimin, sigurinë dhe mbrojtjen e të dhënave personale" me të gjitha elementet ligjore të përcaktuara në pikën 1 të nenit 27 të Ligjit, konsiderohet një detyrim shumë i rëndësishëm, në zbatim të neneve 27 dhe 28 të Ligjit, për të mundësuar shmangien e pasojave të rënda që mund të vijnë për subjektet e të dhënave.

Gjithashtu, në këto akte duhet të përcaktohen në mënyrë të detajuar rregulla dhe procedura organizative për të gjitha aspektet e përpunimit të të dhënave, duke përfshirë mënyrën e përpunimit, masat e sigurisë fizike, teknike dhe administrative, ruajtjen dhe konfidencialitetin e të dhënave, aksesin, si dhe afatet e ruajtjes së të dhënave.

6. Rezulton se Kontrolluesi nuk ka marrë masat e duhura teknike dhe organizative për të garantuar një nivel sigurie të përshtatshëm ndaj rrezikut, duke përfshirë, ndër të tjera, *pseudonimizimin dhe enkriptimin e të dhënave personale; aftësinë për të garantuar konfidencialitetin, integritetin, disponueshmërinë dhe qëndrueshmërinë e sistemeve dhe të shërbimeve të përpunimit; aftësinë për të rivendosur disponueshmërinë dhe aksesin në të dhënat personale brenda një kohe të arsyeshme në rast incidenti fizik ose teknik; një proces për testimin, shqyrtimin dhe vlerësimin e rregullt të efikasitetit të masave teknike dhe organizative për të garantuar sigurinë e përpunimit* etj., në kundërshtim me parashikimet e nenit 28 të Ligjit dhe Vendimit nr.6, datë 05.08.2013, të Komisionerit "Për përcaktimin e rregullave të hollësishme për sigurimin e të dhënave personale" (në vijim "Vendimi nr. 6").

   Kontrolluesi, për shkak të veprimtarisë së tij, nuk ka marrë masa për të krijuar, zbatuar, mirëmbajtur dhe përmirësuar në mënyrë të vazhdueshme një Sistem Menaxhimi të të Dhënave Personale (*Privacy Information Management System "PIMS"*), sipas Udhëzimit nr. 09, datë 20.11.2025 "Për kriteret e përgjithshme për certifikimin dhe për dhënien e vulave dhe të shenjave të mbrojtjes së të dhënave personale" (në vijim "Udhëzimi nr. 09") .

   Kuadri ligjor evropian mbi mbrojtjen e të dhënave personale të cilin Ligji transpozon dhe praktika më e mirë evropiane e konsideron certifikimin si një mekanizëm përputhshmërie me Ligjin[1], dhe për të inkurajuar zbatimin e tij i krijon rast pas rasti kontrolluesve që e zbatojnë atë në mënyrë efektive një pozitë preferenciale në kryerjen e disa veprimtarive përpunuese të caktuara, siç janë transferimet ndërkombëtare. Në këtë kuadër, në zbatim të nenit 37 të Ligjit, i cili parashikon dhe rregullon mekanizmin e certifikimit, Komisioneri ka miratuar Udhëzimin nr. 08, datë 20.11.2025 "Për kriteret shtesë për akreditimin e organizmave certifikues" (në vijim "Udhëzimi nr. 08") dhe Udhëzimin nr. 09.

[1] *Pika 3 e nenit 22, pika 3 e nenit 28*

Udhëzimi nr. 09 referon në Sistemet e Menaxhimit të të Dhënave Personale (*Privacy Information Management System "PIMS"*) dhe Komisioneri inkurajon kontrolluesit, të cilët për shkak të natyrës së veprimtarisë së tyre e kanë të nevojshëm ngritjen e një sistemi të tillë me qëllim standardizimin dhe rregullimin e veprimtarisë përpunuese dhe garantimin e sigurisë së përpunimit të të dhënave personale, të zbatojnë Udhëzimet nr. 08 dhe nr. 09.

Në rastin konkret, Zyra e Komisionerit vlerëson se, për shkak të natyrës së veprimtarisë që ushtron, e cila kërkon masa të shtuara teknike dhe organizative për garantimin e sigurisë së të dhënave personale, Kontrolluesi duhet të krijojë, mirëmbajë dhe administrojë një sistem menaxhimi të të dhënave personale (PIMS), në përputhje me parashikimet e Udhëzimit nr. 09.

Bazuar në nenin 28 të Ligjit dhe nenin 13 të Udhëzimit nr. 09, Kontrolluesi duhet të marrë masa konkrete teknike dhe organizative, që garantojnë nivel të përshtatshëm për rrezikun, masa të cilat duhet të rishikohen në mënyrë periodike për të siguruar efektivitet të vazhdueshëm.

7. Nga verifikimi i infrastrukturës, rezulton se Kontrolluesi e ka të organizuar rrjetin e brendshëm të internetit me pajisje kompjuterike, të cilat nuk janë të qendërzuara sipas modelit të *domain controller*-it apo ekuivalente, duke sjellë mungesën e një arkitekture të unifikuar për administrimin e përdoruesve, autorizimeve dhe politikave të sigurisë. Kjo mënyrë organizimi rrit rrezikun për akses të paautorizuar, mungesë gjurmueshmërie dhe dobësi në menaxhimin e privilegjeve, në kundërshtim me kërkesën e neneve 27 dhe 28 të Ligjit për garantimin e konfidencialitetit, integritetit dhe disponueshmërisë së të dhënave personale përmes masave të përshtatshme teknike.

   Zyra e Komisionerit vlerëson se organizimi i infrastrukturës së teknologjisë së informacionit nga ana e Kontrolluesit, në mungesë të një sistemi të centralizuar për menaxhimin e përdoruesve, autentikimit dhe autorizimeve (si *domain controller* apo mekanizma ekuivalentë), nuk garanton një nivel të përshtatshëm sigurie, në përputhje me kërkesat e nenit 28 të Ligjit nr. 124/2024.

   Kjo situatë krijon dobësi të konsiderueshme në administrimin e privilegjeve, kontrollin e aksesit dhe gjurmueshmërinë e veprimeve, duke rritur rrezikun për akses të paautorizuar dhe cenim të konfidencialitetit, integritetit dhe disponueshmërisë së të dhënave personale.

8. Konstatohet se Kontrolluesi, me Vendimin nr. 10, datë 02.06.2026 "Për caktimin e personit përgjegjës për mbrojtjen e të dhënave personale", ka caktuar personin përgjegjës (*Privacy & Data Protection Officer*), si dhe ka përcaktuar detyrat në ushtrim të funksionit të këtij pozicioni sipas legjislacionit për mbrojtjen e të dhënave personale.

Megjithatë, Kontrolluesi nuk ka përmbushur detyrimin për informim, nëpërmjet publikimit të të dhënave të tij në faqen zyrtare të internetit, me qëllim që subjektet e të dhënave të mund ta kontaktojnë për çështje që lidhen me proceset përpunuese dhe ushtrimin e të drejtave të tyre, si dhe nuk ka kryer njoftimin pranë Komisionerit për caktimin e tij, sipas pikës 3 të nenit 34 të Ligjit.

Zyra e Komisionerit vlerëson se caktimi i një nëpunësi për mbrojtjen e të dhënave personale është një detyrim i rëndësishëm, që ka për qëllim garantimin e sigurisë së të dhënave personale gjatë proceseve përpunuese, që realizohen nga ana e Kontrolluesit gjatë ushtrimit të veprimtarisë së tij.

Gjithashtu, bazuar në pikën 3 të nenit 34 të Ligjit, Kontrolluesi ka detyrimin për të publikuar të dhënat e nëpunësit të mbrojtjes së të dhënave, në mënyrë që subjektet e të dhënave të mund ta kontaktojnë atë për të gjitha çështjet që lidhen me përpunimin e të dhënave të tyre personale dhe ushtrimin e të drejtave të tyre sipas këtij Ligji, si dhe për t'ia njoftuar ato Zyrës së Komisionerit.

9. Konstatohet se në aktet e brendshme rregullatore, që Kontrolluesi disponon në funksion të mbrojtjes së të dhënave personale, përcakton se kryen trajnime ndërgjegjësuese periodike lidhur me mbrojtjen e të dhënave, sigurinë e informacionit, detyrimet e konfidencialitetit dhe procedurat e brendshme të sigurisë për punonjësit që kanë akses në të dhënat personale dhe, konkretisht, në nenin 25 të rregullores "Për mbrojtjen e të dhënave personale" dhe nenin 16 të rregullores "Për administrimin, sigurinë dhe mbrojtjen e të dhënave personale".

   Megjithatë, nga shqyrtimi në tërësi i dokumentacionit të vënë në dispozicion nga Kontrolluesi, nuk evidentohen materiale/akte provuese (si listëprezencë, modulet e trajnimit etj.) lidhur me zbatueshmërinë e këtij parashikimi/detyrimi, sipas nenit 34 të Ligjit.

   Zyra e Komisionerit vlerëson se, bazuar në nenin 34 të Ligjit, Kontrolluesi duhet të marrë masa konkrete në kuadër të trajnimit të punonjësve që kanë akses dhe janë të përfshirë në veprimet e përpunimit, bazuar në legjislacionin në fuqi për mbrojtjen e të dhënave personale, si dhe të mbajë dhe administrojë dokumentacionin përkatës mbi realizimin e trajnimeve.

   Trajnimet në lidhje me mbrojtjen e të dhënave personale duhet të jenë të vazhdueshme dhe të përshtatura sipas nevojave dhe proceseve të punës së Kontrolluesit dhe legjislacionit në fuqi për mbrojtjen e të dhënave personale, me qëllim informimin, këshillimin dhe ndërgjegjësimin e punonjësve, të cilët për shkak të proceseve të punës janë të ngarkuar me përpunimin e të dhënave personale.

Në përfundim të hetimit administrativ, referuar provave dhe konstatimeve në vend, grupi i hetimit administrativ hartoi procesverbalin përkatës, një kopje e të cilit i është dërguar Kontrolluesit në rrugë postare dhe në formë elektronike.

Në respektim të së drejtës për t'u dëgjuar, në zbatim të neneve 87-89 të Kodit të Procedurave Administrative, Kontrolluesi është ftuar të marrë pjesë në seancë dëgjimore, përpara marrjes së vendimit përfundimtar nga ana e Komisionerit.

Përfaqësuesi i Kontrolluesit është paraqitur në seancën dëgjimore, të datës 08.07.2026, të organizuar nga Zyra e Komisionerit, gjatë së cilës ka deklaruar angazhimin për rikuperimin e shkeljeve të konstatuara gjatë hetimit administrativ, si dhe bashkëpunimin me Komisionerin, për të siguruar që çdo mangësi të adresohet në përputhje me Ligjin.

Gjithashtu, nga ana e Kontrolluesit, me shkresën nr. 15/1 prot., datë 06.07.2026, administruar me tonën me nr. 1636 prot., datë 06.07.2026, janë përcjellë pretendimet me shkrim lidhur me gjetjet e procesverbalit të hetimit administrativ.

Në përfundim, Zyra e Komisionerit vlerëson bashkëpunimin e Kontrolluesit me grupin e kontrollit gjatë ushtrimit të hetimit administrativ, si dhe angazhimin e tij për të rikuperuar shkeljet e konstatuara. Plotësimi i këtyre detyrimeve nga ana e Kontrolluesit është mjaft i rëndësishëm, pasi garanton përpunimin e ligjshëm, sigurinë e të dhënave personale dhe shmang mundësinë e përhapjes së tyre në mënyrë të paligjshme.

PËR KËTO ARSYE:

Në zbatim të neneve 6, 7,13, 26, 27, 28, 34, 81, 82, 83 dhe 84 të Ligjit, Komisioneri,

REKOMANDON:

1. Kontrolluesi, shoqëria "NOSHI" sh.p.k., të ketë në vëmendje përcaktimin e planeve të kamerave përmes sistemit të video-survejimit (CCTV), në përputhje me parashikimet e neneve 6 dhe 7 të Ligjit;

2. Kontrolluesi, shoqëria "NOSHI" sh.p.k., të ketë në vëmendje përditësimin e rubrikës "Politikat e Privatësisë", në faqen zyrtare https://www.opel-noshi.al, me qëllim informimin e plotë të subjekteve të të dhënave, sipas parashikimeve të nenit 13 të Ligjit;

3. Kontrolluesi, shoqëria "NOSHI" sh.p.k., në zbatim të neneve 27 dhe 28 të Ligjit, të ketë në vëmendje përditësimin e akteve të brendshme rregullatore, rregulloren "Për mbrojtjen e të dhënave personale" dhe rregulloren "Për administrimin, sigurinë dhe mbrojtjen e të dhënave personale", duke parashikuar në të masa konkrete teknike dhe organizative për mbrojtjen e të dhënave personale, për çdo kategori të dhënash dhe për çdo proces përpunimi, mënyrat e përpunimit të të dhënave, të drejtat e subjekteve të të dhënave, përcaktimin e niveleve të aksesit etj.;

4. Kontrolluesi, shoqëria "NOSHI" sh.p.k., të marrë masa për përditësimin e marrëveshjes me përpunuesin, duke specifikuar detyrimet midis palëve, masat tekniko-organizative, sipas detyrimeve të parashikuara në nenin 26 të Ligjit dhe Udhëzimin nr. 19;

5. Kontrolluesi Shoqëria "*NOSHI*" shpk, të marrë masa për publikimin e të dhënave të kontaktit të nëpunësit për mbrojtjen e të dhënave personale, në faqen zyrtare të internetit https://www.opel-noshi.al, si dhe, të marrë masa lidhur me trajnimin e punonjësve që kanë akses dhe përpunojnë të dhëna personale, sipas parashikimeve të nenit 34 të Ligjit;

6. Në zbatim të nenit 84 të Ligjit, të përmbushen detyrimet, sipas këtij akti brenda afateve, si vijon:

   i) vazhdimisht, detyrimet e përcaktuara në pikat 1 dhe 2 më sipër;
   ii) brenda 30 (tridhjetë) ditëve, detyrimet e përcaktuara në pikat 3 dhe 4 më sipër;
   iii) brenda 45 (dyzet e pesë) ditëve, detyrimin e përcaktuar në pikën 5 më sipër.

   Afatet e sipërpërmendura fillojnë nga data e marrjes dijeni të këtij akti.

7. Kontrolluesi të njoftojë Komisionerin për masat e marra brenda 60 (gjashtëdhjetë) ditëve;

8. Komisioneri, bazuar në shkronjën "a" të pikës 2 të nenit 83 të Ligjit, paralajmëron kontrolluesit ose përpunuesit se veprimet e përpunimit mund të rezultojnë në mosplotësim të dispozitave ligjore dhe u jep atyre rekomandime lidhur me përputhshmërinë me Ligjin. Në rast të moszbatimit të tyre, Komisioneri vepron sipas neneve 92, 93 dhe 94 të Ligjit, për vendosjen e sanksioneve administrative në përputhje me nenet përkatëse, si dhe në përputhje me legjislacionin në fuqi për kundërvajtjet administrative, në mënyrë të tillë që këto masa të jenë efektive, proporcionale dhe me karakter parandalues.

Ky Rekomandim u shpall sot, më 14.07.2026.

KOMISIONERI

Besnik Dervishi